

四庫全書

史部

欽定四庫全書

左傳紀事本末卷十九

詹事府詹事高士奇撰

齊五公子爭立

僖公二年齊寺人貂始漏師於多魚 十七年齊侯之夫人三王姬徐嬴蔡姬皆無子齊侯好內多內寵內嬖如夫人者六人長衛姬生武孟少衛姬生惠公鄭姬生孝公葛嬴生昭公密姬生懿公宋華子生公子雍公與

管仲屬孝公於宋襄公以為太子雍巫有寵於衛共姬因寺人貂以薦羞於公亦有寵公許之立武孟管仲卒五公子皆求立冬十月乙亥齊桓公卒易牙入與寺人貂因內寵以殺羣吏而立公子無虧孝公奔宋

逸補韓非子人有設桓公隱者曰一難二難三難何也

桓公不能對以告管仲管仲對曰一難近優而遠士二難也去其國而數之海三難也君老而晚置太子桓公曰善不擇日而廟禮太子或曰管仲之射隱不

得也物之所謂難者必借人成勢而勿侵害已可謂一難也貴妾不使二后二難也愛孽不使危正嫡專聽一臣而不敢偶君此則可謂三難也

呂氏春秋管仲有病桓公往問之曰仲父之疾病矣瀆甚國人弗諱寡人將誰屬國管仲對曰昔者臣盡力竭智猶未足以知之也今病在于朝夕之中臣奚能言桓公曰此大事也願仲父之教寡人也管仲敬諾曰公誰欲相公曰鮑叔牙可乎管仲對曰不可夷

吾善鮑叔牙鮑叔牙之為人也清廉潔直視不已若者不比于人一聞人之過終身不忘勿已則隰朋其可乎隰朋之為人也上志而下求醜不若黃帝而哀不已若者其于國也有不聞也其于物也有不知也其于人也有不見也勿已乎則隰朋可也夫相大官也處大官者不欲小察不欲小智故曰大臣不斲大庖不豆大勇不鬪大兵不寇桓公行公用私惡用管子而為五伯長行私阿所愛用豎刁而蟲出于戶

史記管仲病桓公問曰羣臣誰可相者管仲曰知臣莫如君公曰易牙如何對曰殺子以適君非人情不可公曰開方如何對曰倍親以適君非人情難近公曰豎刁如何對曰自宮以適君非人情難親管仲死而桓公用管仲言卒近用三子三子專權

呂氏春秋管仲有疾桓公往問之曰仲父之疾病矣將何以教寡人管仲曰齊鄙人有諺曰居者無載行者無埋今臣將有遠行胡可以問桓公曰願仲父之

無讓也管仲對曰願君之遠易牙豎刁常之巫衛公子啓方公曰易牙烹其子以慊寡人猶尚可疑耶管仲對曰人之情非不愛其子也其子之忍又將何有于君公又曰豎刁自宮以近寡人猶尚可疑耶管仲對曰人之情非不愛其身也其身之忍又將何有于君又曰常之巫審于死生能去苛病猶尚可疑耶管仲對曰死生命也苛病失也君不任其命守其本而恃常之巫彼將以此無不為也公又曰衛公子啓方

事寡人十五年矣其父死而不敢歸哭猶尚可疑耶
管仲對曰人之情非不愛其父也其父之忍又將何
有于君公曰諾管仲死盡逐之食不甘宮不治苛病
起朝不肅居三年公曰仲父不亦過乎孰謂仲父盡
之乎于是皆復召而反明年公有病常之巫從中出
曰公將以某日薨易牙豎刁常之巫相與作亂塞宮
門築高牆不通人矯以公令有一婦人踰垣入至公
所公曰我欲食婦人曰吾無所得公又曰吾欲飲婦

人曰吾無所得公曰何故對曰常之巫從中出曰公將以某日薨易牙豎刁常之巫相與作亂塞宮門築高牆不通人故無所得衛公子啓方以書社四十下衛公慨焉流涕出曰嗟乎聖人之所見豈不遠哉若死者有知我將何面目以見仲父乎蒙衣袂而絕乎壽宮蟲流出於戶上蓋以楊門之扇三月不葬

十八年春宋襄公以諸侯伐齊三月齊人殺無虧齊人將立孝公不勝四公子之徒遂與宋人戰夏五月宋

敗齊師于甗立孝公而還 二十六年東門襄仲臧文
仲如楚乞師 冬公以楚師伐齊取穀凡師能左右之
曰以寘桓公子雍于穀易牙奉之以為魯援楚申公叔
侯成之桓公之子七人為七大夫于楚 二十七年夏
齊孝公卒有齊怨不廢喪紀禮也 文公十四年子叔
姬妃齊昭公生舍叔姬無寵舍無威公子商人驟施於
國而多聚士盡其家貸於公有司以繼之夏五月昭公
卒舍即位 秋七月乙卯夜齊商人弑舍而讓元元曰

爾求之久矣我能事爾爾不可使多蓄憾將免我乎爾
為之 有星孛入于北斗周內史叔服曰不出七年宋
齊晉之君皆將死亂 齊人定懿公使來告難故書以
九月齊公子元不順懿公之為政也終不曰公曰夫己
氏 襄仲使告于王請以王寵求昭姬于齊曰殺其子
焉用其母請受而罪之冬單伯如齊請子叔姬齊人執
之又執子叔姬 十五年春季文子如晉為單伯與子
叔姬故也 齊人許單伯請而赦之使來致命書曰單

伯至自齊貴之也 齊人來歸子叔姬王故也 齊人
侵我西鄙謂諸侯不能也遂伐曹入其郛討其來朝也
季文子曰齊侯其不免乎已則無禮而討於有禮者曰
女何故行禮禮以順天天之道也已則反天而又以討
人難以免矣詩曰胡不相畏不畏于天君子之不虐幼
賤畏于天也在周頌曰畏天之威于時保之不畏于天
將何能保以亂取國奉禮以守猶懼不終多行無禮弗
能在矣 十六年春王正月及齊平公有疾使季文子

會齊侯于陽穀請盟齊侯不肯曰請俟君間 夏五月
公四不視朔疾也 公使襄仲納賂于齊侯故盟于鄆
丘 十七年夏四月癸亥葬聲姜有齊難是以緩 齊
侯伐我北鄙襄仲請盟六月盟于穀 襄仲如齊拜穀
之盟復曰臣聞齊人將食魯之麥以臣觀之將不能齊
君之語偷臧文仲有言曰民主偷必死 十八年春齊
侯戒師期而有疾醫曰不及秋將死公聞之卜曰尚無
及期惠伯令龜卜楚丘占之曰齊侯不及期非疾也君

亦不聞令龜有咎 齊懿公之為公子也與邴歎之父
爭田弗勝及卽位乃掘而刖之而使歎僕納閭職之妻
而使職驂乘夏五月公游于申池二人浴于池歎以扑
扶職職怒歎曰人奪女妻而不怒一扶女庸何傷職曰
與刑其父而弗能病者何如乃謀弑懿公納諸竹中歸
舍爵而行齊人立公子元 秋襄仲莊叔如齊惠公立
故也

臣士奇曰無知之禍桓身厯之會首止而倫定戒

樹子而禁申似非不知國本之為重者奈何閭于
自謀建儲不決致如隱之所謂三難也桓公無適
子諸姬所出凡六人長曰無虧次惠公次孝公次
昭公次懿公次公子雍無虧當立而桓公與管仲
乃屬孝公于宋襄公以為太子及雍巫有寵于衛
共姬因易牙以薦羞又許立無虧雖昧奕者舉棋
之義而無虧以長固為治命矣但既許無虧以立
而儲位未正又無罷黜孝公之命使宋襄無所藉

口則其勢必至于爭總之一念牀第之私情纏綿
寡斷不知實以階之禍耳桓公死無虧立國人相
與奉之踰年為君矣宋襄擁孝公來伐諭之以辭
命可也舉齊國之衆以拒之可也拒之不敵奉無
虧以出上告天王下控方伯徐圖反正亦無不可
也若何一戰不勝而遽以無虧為說齊尚有人耶
然孝公篡而繼其世者昭公也昭公生舍為商人
所弑商人卽懿公也懿公被弑于歟職公子元嗣

立卽惠公也桓公之子五人後先皆主其國亦一異也管仲諫行言聽能得之於取威定伯之始及其霸業既成狎昵羣小雖以將死丁寧之言格而不入冀非言于憂患者易為功言于安樂者難為力耶亦可慨矣

左傳紀事本末卷十九

欽定四庫全書

史部

左傳紀事本末卷二十二

詳校官侍講學士臣平恕

編修臣裴謙覆勘

總校官庶吉士臣何思鈞

校對官中書臣李森

謄錄監生臣官懋斌

欽定四庫全書

左傳紀事本末卷二十

詹事府詹事高士奇撰

靈景經略小國

姜子相

襄公二年春齊侯伐萊萊人使正輿子賂夙沙衛以索
馬牛皆百匹齊師乃還君子是以知齊靈公之為靈也
夏齊姜薨齊侯使諸姜宗婦來送葬召萊子萊子不
會故晏弱城東陽以逼之六年十一月齊侯滅萊萊

恃謀也於鄭子國之來聘也四月晏弱城東陽而遂圍
萊甲寅堙之環城傳於堞及杞桓公卒之月乙未王湫
帥師及正輿子棠人軍齊師齊師大敗之丁未入萊
共公浮柔奔棠正輿子王湫奔莒莒人殺之四月陳無
宇獻萊宗器于襄宮晏弱圍棠十一月丙辰而滅之遷
萊于郎高厚崔杼定其田十七年齊晏桓子卒晏嬰
麤縗斬苴絰帶杖菅屢食鬻居倚廬寢苦枕草其老曰
非大夫之禮也曰唯卿為大夫昭公三年燕簡公多

嬖寵欲去諸大夫而立其寵人冬燕大夫比以殺公之外嬖公懼奔齊書曰北燕伯歎出奔齊罪之也 六年十一月齊侯如晉請伐北燕也 士匄相士鞅逆諸河禮也 晉侯許之十二月齊侯遂伐北燕將納簡公晏子曰不入燕有君矣民不貳吾君賄左右諂諛作大事不以信未嘗可也 七年春王正月暨齊平齊求之也 癸巳齊侯次于號燕人行成曰敝邑知罪敢不聽命先君之敝器請以謝罪公孫晳曰受服而退俟釁而動可也

卷二十一
二月戊午盟于濡上燕人歸燕姬賂以瑤甕玉檣肇耳
不克而還 十二年春齊高偃納北燕伯歎于唐因其
衆也

攷異公羊傳伯于陽者何公子陽生也子曰吾乃知之
矣在側者曰子苟知之何以不革曰如爾所不知何
春秋之信史也其序則齊桓晉文其會則主會者為
之也其詞則丘有罪焉爾

明發按此傳聞師說之誤歐陽公所以致疑于三傳也

十四年秋八月莒著丘公卒郊公不感國人弗順欲立
著丘公之弟庚輿蒲餘侯惡公子意恢而善於庚輿郊
公惡公子鐸而善於意恢公子鐸因蒲餘侯而與之謀
曰爾殺意恢我出君而納庚輿許之 冬十二月蒲餘
侯茲夫殺莒公子意恢郊公奔齊公子鐸逆庚輿於齊
齊隰黨公子鉏送之有賂田 十九年秋齊高發帥師
伐莒莒子奔紀鄣使孫書伐之初莒有婦人莒子殺其
夫已為嫠婦及老託於紀鄣紡焉以度而去之及師至

則投諸外或獻諸子占子占使師夜縋而登登者六十人縋絕師鼓譟城上之人亦譟莒共公懼啓西門而出七月丙子齊師入紀二十年齊侯疥遂瘡期而不瘳諸侯之賓問疾者多在梁丘據與喬欵言於公曰吾事鬼神豐於先君有加矣今君疾病為諸侯憂是祝史之罪也諸侯不知其謂我不敬君盍誅於祝固史嚚以辭賓公說告晏子晏子曰日宋之盟屈建問范會之德於趙武趙武曰夫子之家事治言於晉國竭情無私其祝

史祭祀陳信不愧其家事無猜其祝史不祈建以語康
王康王曰神人無怨宜夫子之光輔五君以為諸侯主
也公曰據與款謂寡人能事鬼神故欲誅於祝史子稱
是語何故對曰若有德之君外內不廢上下無怨動無
違事其祝史薦信無愧心矣是以鬼神用饗國受其福
祝史與焉其所以蕃祉老壽者為信君使也其言忠信
於鬼神其適遇淫君外內頗邪上下怨疾動作辟違從
欲厭私高臺深池撞鐘舞女斬刈民力輸掠其聚以成

其違不恤後人暴虐淫從肆行非度無所還忌不思謗讟不憚鬼神怒民痛無悛於心其祝史薦信是言罪也其蓋失數美是矯誣也進退無辭則虛以求媚是以鬼神不饗其國以禍之祝史與焉所以夭昏孤疾者為暴君使也其言僭嫚於鬼神公曰然則若之何對曰不可為也山林之木衡鹿守之澤之萑蒲舟鯀守之藪之薪蒸虞候守之海之鹽蜃祈望守之縣鄙之人入從其政偏介之關暴征其私承嗣大夫强易其賄布常無藝

徵斂無度宮室日更淫樂不違內寵之妾肆奪於市外
寵之臣僭令於鄙私欲養求不給則應民人苦病夫婦
皆詛祝有益也詛亦有損聊攝以東姑尤以西其為人
也多矣雖其善祝豈能勝億兆人之詛君若欲誅於祝
史修德而後可公說使有司寬政毀闢去禁薄斂已責

十二月齊侯田于沛招虞人以弓不進公使執之辭
曰昔我先君之田也旃以招大夫弓以招士皮冠以招
虞人臣不見皮冠故不敢進乃舍之仲尼曰守道不如

守官君子餧之 齊侯至自田晏子侍于遄臺子猶馳而造焉公曰唯據與我和夫晏子對曰據亦同也焉得為和公曰和與同異乎對曰異和如羹焉水火醯醢鹽梅以烹魚肉燶之以薪宰夫和之齊之以味濟其不及以洩其過君子食之以平其心君臣亦然君所謂可而有否焉臣獻其否以成其可君所謂否而有可焉臣獻其可以去其否是以政平而不干民無爭心故詩曰亦有和羹既戒既平鬷嘏無言時靡有爭先王之濟五味

和五聲也以平其心成其政也聲亦如味一氣二體三
類四物五聲六律七音八風九歌以相成也清濁大小
短長疾徐哀樂剛柔遲速高下出入周疏以相濟也君
子聽之以平其心心平德和故詩曰德音不瑕今據不
然君所謂可據亦曰可君所謂否據亦曰否若以水濟
水誰能食之若琴瑟之專一誰能聽之同之不可也如
是飲酒樂公曰古而無死其樂若何晏子對曰古而無
死則古之樂也君何得焉昔堯鳩氏始居此地季崩因

之有逢伯陵因之蒲姑氏因之而後大公因之古若無死爽鳩氏之樂非君所願也

逸補晏子春秋公孫接田開疆古冶子事景公以勇力

搏虎聞晏子過而趨三子者不起晏子入見公曰臣聞明君之蓄勇力之士也上有君臣之義下有長率之倫內可以禁暴外可以威敵上利其功下服其勇故尊其位重其祿今君之蓄勇力之士也上無君臣之義下無長率之倫內不以禁暴外不以威敵此危

國之器也不若去之公曰三子者搏之恐不得刺之
恐不中也晏子曰此皆力攻勍敵之人也無長幼之
禮因請公使人少餽之二桃曰三子何不計功而食
桃公孫接仰天而嘆曰晏子智人也夫使公之計吾
功者不受桃是無勇也士衆而桃寡何不計功而食
桃矣接一搏彌而再搏乳虎若接之功可以食桃而
無與人同矣援桃而起田開疆曰吾伏兵而卻三軍
者再若開疆之功亦可以食桃而無與人同矣援桃

而起古治子曰吾嘗從君濟于河龜銜左驂以入砥
柱之流當是時也治少不能游潛行逆流百步順流
九里得龜而殺之左操驂尾右挈龜頭鶴躍而出津
人皆曰河伯也若治視之則大龜之首若治之功可
以食桃而無與人同矣二子何不反桃抽劍而起公
孫接田開疆曰吾勇不子若功不子逮取桃不讓是
貪也然而不死無勇也皆反其桃挈領而死古治子
曰二子死之治獨生之不仁耻人以言而夸其聲不

義恨乎所行不死無勇雖然二子同桃而節治專其
桃而宜亦反其桃犁領而死使者復曰已死矣公殮
之以服葬之以士禮焉

說苑景公正畫被髮乘六馬御婦人以出正閨則跪
擊其馬而反之曰爾非吾君也公慚而不朝晏子睹
喬敖而問曰君何故不朝對曰昔者君正畫被髮乘
六馬御婦人出正閨則跪擊其馬而反之曰爾非吾
君也公慚而反不果出是以不朝晏子入見公曰昔

者寡人有罪被髮乘六馬以出正閨刖跪擊其馬而反之曰爾非吾君也寡人以天子大夫之賜得率百姓以守宗廟今見戮于刖跪以辱社稷吾猶可以齊于諸侯乎晏子對曰君無惡焉臣聞之下無直辭上無隱君民多諱言君有驕行古者明君在上下有直辭君上好善民無諱言今君有失行而刖跪有直辭是君之福也故臣來慶請賞之以明君之好善禮之以明君之受諫公笑曰可乎晏子曰可于是令刖跪

倍資無正時朝無事

二十二年春王二月甲子齊北郭啓帥師伐莒。莒子將戰。苑羊牧之諫曰：「齊帥賤其求，不多不如下之。大國不可怒也。」弗聽。敗齊師于壽餘。齊侯伐莒。莒子行成司馬。寵如莒。涖盟。莒子如齊。涖盟于稷門之外。莒於是乎大惡其君。二十三年。莒子庚輿虐而好劍。苟鑄劍必試諸人。國人患之。又將叛齊。烏存帥國人以逐之。庚輿將出。聞烏存執殳而立於道左。懼。將止。死。苑羊牧之曰：

君過之烏存以力聞可矣何必以弑君成名遂來奔齊人納郊公 二十六年齊有彗星齊侯使禳之晏子曰無益也祗取誣焉天道不諂不貳其命若之何禳之且天之有彗也以除穢也君無穢德又何禳焉若德之穢禳之何損詩曰惟此文王小心翼翼昭事上帝聿懷多福厥德不回以受方國君無違德方國將至何患於彗詩曰我無所監夏后及商用亂之故民卒流亡若德回亂民將流亡祝史之為無能補也公說乃止

臣士奇曰齊靈肆其暴橫數伐隣國圍齊之役身
幾不免事在魯襄之十有八年伐滅萊裔其一端
也萊恃夙沙之賂而不虞齊人之復至自取滅亡
為齊役屬夾谷之會將以萊兵刦魯侯可見矣晏
子顯君與管仲後先輝映而傳所載數事無足深
取齊莊無道陵犯伯國焚庭郢邵之兵淫逞已甚
不戢自焚旋以拊楹隊命晏子雖嘗憂之不聞能
強諫也及莊公被弑不過以枕股三踊同衆人之

報其謂民望何景公嗣世疊經崔慶欒高之亂皆不能有所匡正而燕款之納僅至唐邑未能即其國都與仲父之城三亡國者殆霄壤矣郊公之奔始焉歸庚輿而溺其賂其後不終賦旄丘之葛僅能補過也當時晉政多門諸侯解體齊景陰有小伯之志是以假置君為市義之術伐徐盟莒鹹沙安甫之間左提右挈伯國莫敢致詰焉世之所謂以其君顯者此也竊謂不然方萊裔之譖齊君負

大不義于天下及孔子以禮責齊景公愧悔無地
晏子能以一言感悟齊侯三田來歸書之簡策魯
有餘榮而齊君轉圜之美亦聲施不朽乃其顯君
之最大者管晏並稱意當以此豈在霸業哉嘗讀
晏子春秋其言論多可采先儒謂其本墨氏夫墨
氏原于老子者也晏子于患難之際大抵以退避
為長策如云人有君而人弑之吾焉得死之而焉
得亡之正老氏教也二桃而殺三勇士清淨流為

名法不其然哉

左傳紀事本末卷二十

欽定四庫全書

左傳紀事本末卷二十一

詹事府詹事高士奇撰

崔慶之亂

宣公十年夏齊惠公卒崔杼有寵於惠公高國畏其逼也公卒而遂之奔衛書曰崔氏非其罪也且告以族不以名凡諸侯之大夫違告於諸侯曰某氏之守臣某失守宗廟敢告所有玉帛之使者則告不然則否成公

十七年齊慶克通于聲孟子與婦人蒙衣乘輦而入于閔鮑牽見之以告國武子武子召慶克而謂之慶克久不出而告夫人曰國子謫我夫人怒國子相靈公以會高鮑處守及還將至閉門而索客孟子訴之曰高鮑將不納君而立公子角國子知之秋七月壬寅刖鮑牽而逐高無咎無咎奔莒高弱以盧叛齊人來召鮑國而立之初鮑國去鮑氏而來為施孝叔臣施氏卜宰匡句須吉施氏之宰有百室之邑與匡句須邑使為宰以讓鮑

國而致邑焉施孝叔曰子實吉對曰能與忠良吉孰大
焉鮑國相施氏忠故齊人取以為鮑氏後仲尼曰鮑莊
子之知不如葵葵猶能衛其足

放證家語樊遲問於孔子曰鮑章事齊君執政不撓可

謂忠矣而君刖之其為至閭乎孔子曰古之仕者國
有道則盡忠以輔之國無道則退身以避之今鮑莊
子食於淫亂之朝不量主之明暗以受大刑是智之
不如葵葵猶能衛其足

冬齊侯使崔杼為大夫使慶克佐之帥師圍盧國佐從
諸侯圍鄭以難請而歸遂如盧師殺慶克以穀叛齊侯
與之盟于徐闢而復之十二月盧降使國勝告難于晉
待命于清十八年春齊為慶氏之難故甲申晦齊侯
使士華免以戈殺國佐于內宮之朝師逃于夫人之宮
書曰齊殺其大夫國佐棄命專殺以穀叛故也使清人
殺國勝國弱來奔王湫奔萊慶封為大夫慶佐為司寇
既齊侯反國弱使嗣國氏禮也襄公十年三月癸丑

齊高厚相大子光以先會諸侯于鍾離不敬士莊子曰
高子相大子以會諸侯將社稷是衛而皆不敬棄社稷
也其將不免乎十八年冬十月會于魯濟同伐齊齊
侯禦諸平陰十九年齊侯娶于魯曰顏懿姬無子其
姪鬷聲姬生光以為太子諸子仲子戎子戎子嬖仲子
生牙屬諸戎子戎子請以為太子許之仲子曰不可廢
常不祥間諸侯難光之立也列於諸侯矣今無故而廢
之是專黜諸侯而以難犯不祥也君必悔之公曰在我

而已遂東太子光使高厚傳牙以為太子夙沙衛為少
傅齊侯疾崔杼微逆光疾病而立之光殺戎子尸諸朝
非禮也婦人無刑雖有刑不在朝市夏五月壬辰晦齊
靈公卒莊公即位執公子牙於句瀆之丘以夙沙衛易
己衛奔高唐以叛八月齊崔杼殺高厚於灑藍而兼
其室書曰齊殺其大夫從君於昏也齊慶封圍高唐
弗克冬十一月齊侯圍之見衛在城上號之乃下問守
備焉以無備告揖之乃登聞師將傅食高唐人殖綽工

僂會夜縛納師醢衛于軍 二十一年春齊侯使慶佐
為大夫復討公子牙之黨執公子買于句瀆之丘公子
鉏來奔叔孫還奔燕 秋晉欒盈出奔楚 冬會于商
任鉶欒氏也齊侯衛侯不敬叔向曰二君者必不免會
朝禮之經也禮政之輿也政身之守也怠禮失政失政
不立是以亂也 齊莊公朝指殖綽郭最曰是寡人之
雄也州綽曰君以為雄誰敢不雄然臣不敏平陰之役
先二子鳴莊公為勇爵殖綽郭最欲與焉州綽曰東問

之役臣左驂迫還於門中識其枚數其可以與於此乎
公曰子為晉君也對曰臣為隸新然二子者譬於禽獸
臣食其肉而寢處其皮矣 二十二年秋樂盈自楚適
齊晏平仲言於齊侯曰商任之會受命于晉今納樂氏
將安用之小所以事大信也失信不立君其圖之弗聽
退告陳文子曰君人執信臣人執共忠信篤敬上下同
之天之道也君自棄也弗能久矣 冬會于沙隨復錮
樂氏也樂盈猶在齊晏子曰禍將作矣齊將伐晉不可

以不懼 二十三年夏晉將嫁女于吳齊侯使析歸父
媵之以藩載欒盈及其士納諸曲沃 秋齊侯伐衛先
驅穀榮御王孫揮召揚為右申驅成秩御莒恒申鮮虞
之傳摯為右曹開御戎晏父戎為右貳廣上之登御邢
公盧蒲癸為右啓牢成御襄罷師狼遂疏為右肱商子
車御侯朝桓跳為右大殿商子游御夏之御寇崔如為
右燭庸之越駟乘自衛將遂伐晉晏平仲曰君恃勇力
以伐盟主若不濟國之福也不德而有功憂必及君崔

杼諫曰不可臣聞之小國間大國之敗而毀焉必受其咎君其圖之弗聽陳文子見崔武子曰將如君何武子曰吾言於君君弗聽也以為盟主而利其難羣臣若急君於何有子姑止之文子退告其人曰崔子將死乎謂君甚而又過之不得其死過君以義猶自抑也况以惡乎齊侯遂伐晉取朝歌為二隊入孟門登太行張武軍於熒庭戍鄖即封少水以報平陰之役乃還趙勝帥東陽之師以追之獲晏釐八月叔孫豹帥師救晉次于雍

榆禮也。冬晉人克欒盈于曲沃。齊侯還自晉不入。
遂襲莒門于且于傷股而退。明日將復戰。期于壽舒。杞
殖華還載甲夜入且于之隧宿于莒郊。明日先遇莒子
於蒲。侯氏莒子重賂之使無死。曰：請有盟。華周對曰：貪
貨棄命亦君所惡也。昏而受命日未中而棄之何以事
君。莒子親鼓之從而伐之。獲杞梁。莒人行成。齊侯歸。遇
杞梁之妻於郊。使弔之。辭曰：殖之有罪。何辱命焉。若免
於罪。猶有先人之敝廬在下。妾不得與郊弔。齊侯弔諸。

其室

補說苑齊莊公且伐莒為車五乘之賓而杞梁華舟

獨不與焉故歸而不食其母曰汝生而無義死而無名則雖非五乘孰不汝笑也汝生而有義死而有名則五乘之賓盡汝下也趣食乃行杞梁華舟同車侍於莊公而行至莒莒人逆之杞梁華舟下鬪獲甲首三百莊公止之曰子止與子同齊國杞梁華舟曰君為五乘之賓而舟染不與焉是少吾勇也臨敵涉難

止我以利是汚吾行也深入多殺者臣之事也齊國之利非吾所知也遂進鬪壞軍陷陳三軍弗敢當至莒城下莒人以炭置地二人立有間不能入隰侯重為右曰吾聞古之士犯患涉難者其去遂於物也來吾踰子隰侯重杖楯伏炭二子乘而入顧而哭之華舟後息杞梁曰汝無勇乎何哭之久也華舟曰吾豈無勇哉是其勇與我同也而先吾死是以哀之莒人曰子母死與子同莒國杞梁華舟曰去國歸敵非忠

臣也去長受賜非正行也且雞鳴而期日中而忘之
非信也深入多殺者臣之事也莒國之利非吾所知
也遂進鬪殺二十七人而死其妻聞之而哭城為之
弛而隅為之崩

列女傳杞梁之妻無子內外皆無五屬之親既無所
歸乃枕其夫之尸於城下而哭內誠動人道路過者
莫不為之揮涕十日而城為之崩既葬曰吾何歸矣
上則無父中則無夫下則無子內無所依以見吾誠

外無所倚以立吾節吾豈能更二哉遂赴淄水而死
二十四年春孟孝伯侵齊晉故也 夏齊侯既伐晉而
懼將欲見楚子楚子使薳啓疆如齊聘且請期齊社蒐
軍實使客觀之陳文子曰齊將有寇吾聞之兵不戢必
取其族 秋齊侯聞將有晉師使陳無宇從薳啓疆如
楚辭且乞師崔杼帥師送之遂伐莒侵介根 八月會
于夷儀將以伐齊水不克 冬楚子伐鄭以救齊門于
東門次于棘澤諸侯還救鄭楚子自棘澤還使薳啓疆

帥師送陳無宇 齊人城郊 二十五年春齊崔杼帥
師伐我北鄙以報孝伯之師也公患之使告于晉孟公
綽曰崔子將有大志不在病我必速歸何患焉其來也
不寇使民不嚴異於他日齊師徒歸 齊棠公之妻東
郭偃之姊也東郭偃臣崔武子棠公死偃御武子以弔
焉見棠姜而美之使偃取之偃曰男女辨姓今君出自
丁臣出自桓不可武子筮之遇困三三之大過三三史
皆曰吉示陳文子文子曰夫從風風隕妻不可娶也且

其繇曰困于石據于蒺藜入于其宮不見其妻凶困于
石往不濟也據于蒺藜所恃傷也入于其宮不見其妻
凶無所歸也崔子曰嫠也何害先夫當之矣遂取之莊
公通焉驟如崔氏以崔子之冠賜人侍者曰不可公曰
不為崔子其無冠乎崔子因是又以其間伐晉也曰晉
必將報欲弒公以說于晉而不獲聞公鞭侍人賈舉而
又近之乃為崔子閒公夏五月莒為且于之役故莒子
朝于齊甲戌饗諸北郭崔子稱疾不視事乙亥公問崔

子遂從姜氏姜入于室與崔子自側戶出公拊楹而歌
侍人賈舉止衆從者而入閉門甲與公登臺而請弗許
請盟弗許請自刃於廟弗許皆曰君之臣杼疾病不能
聽命近於公宮陪臣干椒有淫者不知二命公踰牆又
射之中股反隊遂弑之賈舉州綽邴師公孫敖封具鐸
父襄伊僂堙皆死祝佗父祭於高唐至復命不說弁而
死於崔氏申蒯侍漁者退謂其宰曰爾以帑免我將死
其宰曰免是反子之義也與之皆死崔氏殺鬷蔑于平

陰晏子立於崔氏之門外其人曰死乎曰獨吾君也乎哉吾死也曰行乎曰吾罪也乎哉吾亡也曰歸乎曰君死安歸君民者豈以陵民社稷是主臣君者豈為其口實社稷是養故君為社稷死則死之為社稷亡則亡之若為已死而為已亡非其私暱誰敢任之且人有君而弑之吾焉得死之而焉得亡之將庸何歸門啓而入枕戶股而哭興三踊而出人謂崔子必殺之崔子曰民之望也舍之得民盧蒲癸奔晉王何奔莒

補逸晏子晏子為莊公臣言大用每朝賜爵益邑俄而

不用每朝致邑與爵爵邑盡退朝而乘噴然而歎終

而笑其僕曰何歎笑相從數也晏子曰吾歎也哀吾

君不免於難吾笑也喜吾自得也吾亦無死矣崔杼

果弑莊公晏子立崔杼之門門啓而入崔子曰子何不

死子何不死晏子曰禍始吾不在也禍終吾不知也

吾何為死且吾聞之以亡為行者不足以存君以死

為義者不足以立功嬰宣其婢子也哉其縊而從之

也遂袒免坐枕君尸而哭興三踊而出 崔杼既弑
莊公而立景公杼與慶封相之刲諸將軍大夫及顯
士庶人於大宮之坎上令無得不盟者為壇三仞塗
其下以甲子列環其內外盟者皆脫劍而入惟晏子
不肅崔杼許之有敢不盟者戟拘其頸劍承其心令
自盟曰不與崔慶而與公室者受其不祥言不疾指
不至血者死所殺七人次及晏子晏子奉梧血仰天
歎曰嗚呼崔子為無道而弑其君不與公室而與崔

慶者受此不祥俛而飲血崔杼謂晏子曰子變子言
則齊國吾與子共之子不變子言戟既在脰劍既在
心維子圖之也晏子曰刲吾以刃而失其志非勇也
回吾以利而倍其君非義也崔子子獨不為天討乎
詩云莫莫葛藟施於條枚愷悌君子求福不回今嬰
且可以回而求福乎曲刃鈎之直兵推之嬰不革矣
崔杼將殺之或曰不可子以子之君無道而殺之今
其臣有道之士也又從而殺之不可以為教矣崔子

遂舍之晏子曰若大夫為大不仁而為小仁焉有中
乎趨出授綏而乘其僕將馳晏子撫其手曰徐之疾
不必生徐不必死鹿生於野命懸於厨嬰命有繫矣
按之成節而後去詩云彼已之子舍命不渝晏子之
謂也

韓詩外傳齊崔杼弑莊公荆蒯芮使晉而反其僕曰
君之無道也四隣諸侯莫不聞也以夫子而死之不
亦難乎荆蒯芮曰善哉而言也早言我能諫諫而不

用我能去今既不諫又不去吾聞之食其食死其事
吾既食亂君之食又安得治君而死之遂驅車而入
死其事僕曰人有亂君猶必死之我有治長可無死
乎乃結轡自刎於車上君子聞之曰荆蒯蒿可謂守
節死義矣僕夫則無為死也猶飲食而遇毒也詩曰
夙夜匪懈以事一人荆先生之謂也易曰不恒其德
或承之羞僕夫之謂也

說苑齊人弑其君魯襄公援戈而起曰孰臣而敢殺

其君乎師懼曰夫齊君治之不能任之不肖縱一人
之欲以虐萬夫之性非所以立君也其身死自取之
也今君不愛萬夫之命而傷一人之死奚其過也其
臣已無道矣其君亦不足惜也

叔孫宣伯之在齊也叔孫還納其女於靈公嬖生景公
丁丑崔杼立而相之慶封為左相盟國人於大宮曰所
不與崔慶者晏子仰天歎曰嬰所不唯忠於君利社稷
者是與有如上帝乃歎辛巳公與大夫及莒子盟大史

書曰崔杼弑其君崔子殺之其弟嗣書而死者二人其弟又書乃舍之南史氏聞大史盡死執簡以往聞既書矣乃還問丘嬰以帷縛其妻而載之與申鮮虞乘而出鮮虞推而下之曰君昏不能匡危不能救死不能死而知匿其暱其誰納之行及弇中將舍嬰曰崔慶其追我鮮虞曰一與一誰能懼我遂舍枕轡而寢食馬而食駕而行出弇中謂嬰曰速驅之崔慶之衆不可當也遂來奔崔氏側莊公于北郭丁亥葬諸士孫之里四嬖不蹕

下車七乘不以兵甲 晉侯濟自泮會于夷儀伐齊以報朝歌之役齊人以莊公說使隰鉏請成 秋七月己巳同盟于重丘齊成故也

補逸晏子晏子臣於莊公公不說飲酒令召晏子晏子至入門公令樂人奏歌曰已哉已哉寡人不能說也爾何來為晏子入坐樂人三奏然後知其為已也遂起北面坐地公曰夫子從席曷為坐地晏子對曰嬰聞訟夫坐地今嬰將與君訟敢毋坐地乎嬰聞之衆

而無義彊而無禮好勇而惡賢者禍必及其身若公者之謂矣且嬰言不用願請身去遂趨而歸管籥其家者納之公財在外者斥之市曰君子有力於民則進爵不辭貴富無力於民而旅食不惡貧賤遂徒步而東耕於海濱居數年果有崔杼之難

二十七年春齊慶封來聘其車美孟孫謂叔孫曰慶季之車不亦美乎叔孫曰豹聞之服美不稱必以惡終美車何為叔孫與慶封食不敬為賦相鼠亦不知也 齊

崔杼生成及彊而寡娶東郭姜生明東郭姜以孤入曰
棠无咎與東郭偃相崔氏崔成有疾而廢之而立明成
請老于崔崔子許之偃與无咎弗予曰崔宗邑也必在
宗主成與彊怒將殺之告慶封曰夫子之身亦子所知
也唯无咎與偃是從父兄莫得進矣大恐害夫子敢以
告慶封曰子姑退吾圖之告盧蒲嫳盧蒲嫳曰彼君之
讐也天或者將棄彼矣彼實家亂子何病焉崔之薄慶
之厚也他日又告慶封曰苟利夫子必去之難吾助女

九月庚辰崔成崔彊殺東郭偃棠无咎於崔氏之朝崔子怒而出其衆皆逃求人使駕不得使圉人駕寺人御而出且曰崔氏有福止余猶可遂見慶封慶封曰崔慶一也是何敢然請為子討之使盧蒲嫳帥甲以攻崔氏崔氏堞其宮而守之弗克使國人助之遂滅崔氏殺成與彊而盡俘其家其妻縊嬖復命於崔子且御而歸之至則無歸矣乃縊崔明夜辟諸大墓辛巳崔明來奔慶封當國 二十八年齊慶封好田而耆酒與慶舍政則

以其內實遷于盧蒲嫳氏易內而飲酒數日國遷朝焉使諸亡人得賊者以告而反之故反盧蒲癸矣臣子之有寵妻之慶舍之士謂盧蒲癸曰男女辨姓子不辟宗何也曰宗不余辟余獨焉辟之賦詩斷章余取所求焉惡識宗矣言王何而反之二人皆嬖使執寢戈而先後之公膳日雙雞饔人竊更之以驚御者知之則去其肉而以其洎饋子雅子尾怒慶封告盧蒲嫳盧蒲嫳曰譬之如禽獸吾寢處之矣使析歸父告晏平仲平仲曰嬰

之衆不足用也知無能謀也言弗敢出有盟可也子家
曰子之言云又焉用盟告北郭子車子車曰人各有以
事君非佐之所能也陳文子謂桓子曰禍將作矣吾其
何得對曰得慶氏之木百車於莊文子曰可慎守也已
盧蒲癸王何卜攻慶氏示子之兆曰或卜攻讐言敢獻其
兆子之曰克見血冬十月慶封由于萊陳無宇從丙辰
文子使召之請曰無宇之母疾病請歸慶季卜之示之
兆曰死奉龜而泣乃使歸慶嗣聞之曰禍將作矣謂子

家速歸禍作必於嘗歸猶可及也子家弗聽亦無悛志
子息曰亡矣幸而獲在吳越陳無宇濟水而戕舟發梁
盧蒲姜謂癸曰有事而不告我必不捷矣癸告之姜曰
夫子復莫之止將不出我請止之癸曰諾十一月丁亥
嘗于大公之廟慶舍蒞事盧蒲姜告之且止之弗聽曰
誰敢者遂如公麻嬰為尸慶棄為上獻盧蒲癸王何執
寢戈慶氏以其甲環公宮陳氏鮑氏之圉人為優慶氏
之馬善驚士皆釋甲束馬而飲酒且觀優至於魚里樂

高陳鮑之徒介慶氏之甲子尾抽桷擊扉三盧蒲癸自後刺子之王何以戈擊之解其左肩猶援廟桷動於薨以俎壺投殺人而後死遂殺慶繩麻嬰公懼鮑國曰羣臣為君故也陳須無以公歸祫服而如內宮慶封歸遇告亂者丁亥伐西門弗克還伐北門克之入伐內宮弗克反陳于獄請戰弗許遂來奔獻車於季武子美澤可以鑑展莊叔見之曰車甚澤人必猝宜其亡也叔孫穆子食慶封慶封汜祭穆子不說使工為之誦茅鷁亦不

知既而齊人來讓奔吳吳勾餘予之朱方聚其族焉而居之富於其舊子服惠伯謂叔孫曰天殆富淫人慶封又富矣穆子曰善人富謂之賞淫人富謂之殃天其殃之也其將聚而殲旃

補
逸韓非子慶封為亂于齊而欲走越其族人曰晉近奚不之晉慶封曰越遠利以避難族人曰變是心也居晉而可不變是心也雖遠越其可以安乎

崔氏之亂喪羣公子故鉏在魯叔孫還在燕賈在匱瀆

之丘及慶氏亡皆召之具其器用而反其邑焉與晏子
卽殿其鄙六十弗受子尾曰富人之所欲也何獨弗欲
對曰慶氏之邑足欲故亡吾邑不足欲也益之以卽殿
乃足欲足欲亡無日矣在外不得宰吾一邑不受卽殿
非惡富也恐失富也且夫富如布帛之有幅焉為之制
度使無遷也夫民生厚而用利於是乎正德以幅之使
無黜嫚謂之福利利過則為敗吾不敢貪多所謂幅也
與北郭佐邑六十受之與子雅邑辭多受少與子尾邑

受而稍致之公以為忠故有寵釋盧蒲嫳于北竟求崔
杼之尸將戮之不得叔孫穆子曰必得之武王有亂十
人崔杼其有乎不十人不足以葬既崔氏之臣曰與我
其拱璧吾獻其柩於是得之十二月乙亥朔齊人遷莊
公殯於大寢以其棺尸崔杼於市國人猶知之皆曰崔
子也二十九年二月癸卯齊人葬莊公於北郭昭
公三年秋齊侯田於莒盧蒲嫳見泣且請曰余髮如此
種種余奚能為公曰諾吾告二子歸而告之子尾欲復

之子雅不可曰彼其髮短而心甚長其或寢處我矣九月子雅放盧蒲嫳于北燕四年秋七月楚子以諸侯伐吳使屈申圍朱方八月甲申克之執齊慶封而盡滅其族餘見楚靈王之亂

補逸

呂氏春秋崔杼與慶封謀殺齊莊公莊公死更立

景公崔杼相之慶封又欲殺崔杼而代之相於是孫崔杼之子令之爭後崔杼之子相與私鬪崔杼往見慶封而告之慶封謂崔杼曰且留吾將興甲以殺之

因令盧蒲嬖興甲以誅之盡殺崔杼之妻子及支屬
燒其室屋報崔杼曰吾已誅之矣崔杼歸無歸因而
自絞也慶封相景公景公苦之慶封出獵景公與陳
無宇公孫竈公孫蠆誅封慶封以其屬鬪不勝走如
魯齊人以為讓又去魯而去如吳王子之朱方荆靈王
聞之率諸侯以攻吳圍朱方拔之得慶封負之斧質
以徇于諸侯軍因令其呼之曰母或如齊慶封弑其
君而弱其孤以亡其大夫乃殺之

臣

士奇曰國家之所倚賴者世臣棄世臣而使羣
小間之未有不及于禍敗者也高國齊之世臣而
鮑氏自叔牙援立桓公亦有功世族也崔慶二氏
特疎賤者耳使與政柄而國氏高氏鮑氏以一婦
人之讒覆宗夷族誠可為深歎也慶克通于聲益
醜迹外宣鮑牽憤而言之國武子以是被謫棄位
而姁者毒構其中靈公不察索客之由則鮑牽而
走無咎遂使倒行逆施高弱為盜據之臣國佐受

擅誅之辟彼昏若此雖有衛足之智安能亢宗也
戎子欲立子牙而高厚為之傳莊公反正修郊高
氏崔杼阿其旨殺之灑藍而兼有其室蓋自是崔
慶愈強而齊國之大家幾盡矣何怪其弑君淫酗
禍亂相隨屬而無所致難于其間也崔杼有寵惠
公高國畏其逼而逐之蓋亦逆知後世之患者屏
虎窮山惟恐不遠而又進而狎之恃其不噬難矣
莊公德其援已使之為政而已復不君納伯國之

逋逃以挑其怒又重之以干戈恃外援而不事盟
主崔杼曾無所匡救一意從諛彼已豫畜一剗刃
之狡童以謝大國之討已乃乘廢置而弄其權况
乎又有棠姜之事巧與相值也身被惡名著之史
冊杼罪不勝誅而後知高國之畏逼誠非過計矣
慶封助成弑逆崔杼倚之杼生成及彊而以棠姜
之前子入使主家政廢成而立姜子明成又請老
于崔不得謀于慶封討殺二子杼也憤之慶封因

是盡滅崔氏之室杼無所歸卒苻蕡藜之占杼乃
今而知人之殺其子亦如已之殺人子乎灑藍之
恨應亦少快不獨莊公矣慶封委政慶舍荒淫無
度自恃舍之勇足以彈壓亡人於是莊公之黨復
集而舍麤疎剛復劍在其頸而猶不悟卒死盧蒲
嫗之手夫盧蒲嫗者莊公之黨人也前者慶封用
之以屠滅崔氏今復假手以剪覆慶氏倚伏相尋
昭昭不爽慶封雖幸逃死朱方卒就楚靈之鉞觀

崔慶相戕禍端報反之機大類羿浞已事螳螂黃雀之喻信足為奸雄亂賊之炯戒也盧蒲夔崎嶇隱忍臣役慶舍欲為莊公復讐壻于慶而又賊之其志苦其謀狡矣髮短心長放之北燕有以也慶舍之女知有夫而不知有父安可與杞梁妻同日語哉

左傳紀事本末卷二十一

欽定四庫全書

左傳紀事本末卷二十二

詹事府詹事高士竒撰

陳氏傾齊

桓公五年春正月甲戌己丑陳侯鮑卒再赴也於是陳亂文公子佗殺太子免而代之公疾病而亂作國人分散故再赴 莊公二十二年春陳人殺其太子御寇陳公子完與穎孫奔齊穎孫自齊來奔齊侯使敬仲為卿

辭曰羈旅之臣幸若獲宥及於寬政赦其不閑於教訓而免於罪戾弛於負擔君之惠也所獲多矣敢辱高位以速官謗請以死告詩云翹翹車乘招我以弓豈不欲往畏我友朋使為工正飲桓公酒樂公曰以火繼之辭曰臣卜其晝未卜其夜不敢君子曰酒以成禮不繼以淫義也以君成禮弗納於淫仁也初懿氏卜妻敬仲其妻占之曰吉是謂鳳皇于飛和鳴鏘鏘有媯之後將育于姜五世其昌並于正卿八世之後莫之與京陳厲公

蔡出也故蔡人殺五父而立之生敬仲其少也周史有
以周易見陳侯者陳侯使筮之遇觀三三之否三三曰
是謂觀國之光利用賓于王此其代陳有國乎不在此
其在異國非此其身在其子孫光遠而自他有耀者也
坤土也巽風也乾天也風為天於土上山也有山之材
而照之以天光於是乎居土上故曰觀國之光利用賓
於王庭實旅百奉之以玉帛天地之美具焉故曰利用
賓於王猶有觀焉故曰其在後乎風行而著於土故曰

其在異國乎若在異國必姜姓也姜太嶽之後也山嶽則配天物莫能兩大陳衰此其昌乎及陳之初亡也陳桓子始大於齊其後亡也成子得政 襄公二十九年秋九月齊公孫驩公孫竈放其大夫高止於北燕乙未出書曰出奔罪高止也高正好以事自為功且專故難及之 為高氏之難故高豎以盧叛十月庚寅閭丘嬰帥師圍盧高豎曰苟使高氏有後請致邑齊人立敬仲之曾孫鄭良敬仲也十一月乙卯高豎致盧而出奔晉

晉人城縣而寘旃 三十一年齊子尾害閭丘嬰欲殺之使帥師以伐陽州我問師故夏五月子尾殺閭丘嬰以說于我師工僂灑消竈孔虺賈寅出奔莒出羣公子昭公二年韓宣子來聘遂如齊納幣見子雅子雅召子旗使見宣子宣子曰非保家之主也不臣見子尾子尾見彊宣子謂之如子旗大夫多笑之惟晏子信之曰夫子君子也君子有信其有以知之矣 三年齊侯使晏嬰請繼室於晉既成昏晏子受禮叔向從之宴相與

語叔向曰齊其何如晏子曰此季世也吾弗知齊其為陳氏矣公棄其民而歸於陳氏齊舊四量豆區釜鍾四升為豆各自其四以登於釜釜十則鍾陳氏三量皆登一焉鍾乃大矣以家量貸而以公量收之山水如市弗加於山魚鹽蜃蛤弗加於海民參其力二入於公而衣食其一公聚朽蠹而三老凍餒國之諸市屢賤踊貴民人痛疾而或燠休之其愛之如父母而歸之如流水欲無獲民將焉辟之箕伯直柄虞遂伯戲其相胡公大姬

已在齊矣 初景公欲更晏子之宅曰子之宅近市湫
隘囂塵不可以居請更諸爽壇者辭曰君之先臣容焉
臣不足以嗣之於臣侈矣且小人近市朝夕得所求小
人之利也敢煩里旅公笑曰子近市識貴賤乎對曰既
利之敢不識乎公曰何貴何賤於是景公繁於刑有鬻
踊者故對曰踊貴屢賤既已告於君故與叔向語而稱
之景公於是省於刑君子曰仁人之言其利溥哉晏子
一言而齊侯省刑詩曰君子如祉亂庶遄已其是之謂

乎及晏子如晉公更其宅反則成矣既拜乃毀之而為里室皆如其舊則使宅人反之且諺曰非宅是卜惟鄰是卜二三子先卜鄰矣違卜不祥君子不犯非禮小人不犯不祥古之制也吾敢違諸乎卒復其舊宅公弗許因陳桓子以請乃許之齊公孫竈卒司馬竈見晏子曰又喪子雅矣晏子曰惜也子旗不免殆哉姜族弱矣而媯將始昌二惠競爽猶可又弱一个焉姜其危哉

八年七月甲戌齊子尾卒子旗欲治其室丁丑殺梁嬰

八月庚戌逐子成子工子車皆來奔而立子良氏之宰
其臣曰孺子長矣而相吾室欲兼我也授甲將攻之陳
桓子善於子尾亦授甲將助之或告子旗子旗不信則
數人告將往又數人告於道遂如陳氏桓子將出矣聞
之而還游服而逆之請命對曰聞彊氏授甲將攻子子
聞諸曰弗聞子盍亦授甲無字請從子旗曰子胡然彼
孺子也吾誨之猶懼其不濟吾又寵秩之其若先人何
子盍謂之周書曰惠不惠茂不茂康叔所以服弘大也

桓子稽穎曰頃靈福子吾猶有望遂和之如初 九月
楚師圍陳晉侯問於史趙曰陳其遂亡乎對曰未也公
曰何故對曰陳穎頃之族也歲在鶴火是以卒滅陳將
如之今在析木之津猶將復由且陳氏得政于齊而後
陳卒亡自幕至于瞽瞍無違命舜重之以明德寘德於
遂遂世守之及胡公不淫故周賜之姓使祀虞帝臣聞
盛德必百世祀虞之世數未也繼守將在齊其兆既存
矣 十年齊惠公高氏皆耆酒信內多怨彊於陳鮑氏

而惡之夏有告陳桓子曰子旗子良將攻陳鮑亦告鮑
氏桓子授甲而如鮑氏遭子良醉而騁遂見文子則亦
授甲矣使視二子則皆將飲酒桓子曰彼雖不信聞我
授甲則必逐我及其飲酒也先伐諸陳鮑方睦遂伐饗
高氏子良曰先得公陳鮑焉往遂伐虎門晏平仲端委
立于虎門之外四族召之無所往其徒曰助陳鮑乎曰
何善焉助饗高乎曰庸愈乎然則歸乎曰君伐焉歸公
召之而後入公卜使王黑以靈姑鉢率吉請斷三尺焉

而用之五月庚辰戰於稷樂高敗又敗諸莊國人追之
又敗諸鹿門樂施高彊來奔陳鮑分其室晏子謂桓子
必致諸公讓德之主也讓之謂懿德凡有血氣皆有爭
心故利不可彊思義為愈義利之本也濫利生孽姑使
無濫乎可以滋長桓子盡致諸公而請老於莒桓子召
子山私其幄幕器用從者之衣屨而反棘焉子商亦如
之而反其邑子周亦如之而與之夫子反子城子公公
孫捷而皆益其祿凡公子公孫之無祿者私分之邑國

之貧約孤寡者私與之粟曰詩云陳錫載周能施也桓公是以霸公與桓子莒之旁邑辭穆孟姬為之請高唐陳氏始大昭子至自晉大夫皆見高彊見而退昭子語諸大夫曰為人子不可不慎也哉昔慶封亡子尾多受邑而稍致諸君君以為忠而甚寵之將死疾于公宮輦而歸君親推之其子不能任是以在此忠為令德其子弗能任罪猶及之難不慎也喪夫人之力棄德曠宗以及其身不亦害乎詩曰不自我先不自我後其是之

謂乎 二十六年齊侯與晏子坐于路寢公歎曰美哉
室其誰有此乎晏子曰敢問何謂也公曰吾以為在德
對曰如君之言其陳氏乎陳氏雖無大德而有施於民
豆區釜鍾之數其取之公也薄其施之民也厚公厚歛
焉陳氏厚施焉民歸之矣詩曰雖無德與女式歌且舞
陳氏之施民歌舞之矣後世若少惰陳氏而不亡則國
其國也已公曰善哉是可若何對曰唯禮可以已之在
禮家施不及國民不遷農不移工賈不變士不濫官不

滔大夫不收公利公曰善哉我不能矣吾今而後知禮之可以為國也對曰禮之可以為國也久矣與天地並君令臣共父慈子孝兄愛弟敬夫和妻柔姑慈婦聽禮也君令而不違臣共而不貳父慈而教子孝而箴兄愛而友弟敬而順夫和而義妻柔而正姑慈而從婦聽而婉禮之善物也公曰善哉寡人今而後聞此禮之上也對曰先王所稟於天地以為其民也是以先王上之

逸補晏子景公飲酒田桓子侍望見晏子而復於公曰

請浮晏子公曰何故也無字對曰晏子衣緇布之衣
麋鹿之裘棧軫之車而駕駑馬以朝是隱君之賜也
公曰諾晏子坐酌者奉觴進之曰君命浮子晏子曰
何故也田桓子曰君賜之卿位以尊其身寵之百萬
以富其家羣臣之爵莫尊于子子祿莫重于子今子衣
緇布之衣麋鹿之裘棧軫之車而駕駑馬以朝是則
隱君之賜也故浮子晏子避席曰請飲而後辭乎其
辭而後飲乎公曰辭然後飲晏子曰君之賜卿位以

尊其身嬰非敢為顯受也為行君令也寵以百萬以
富其家嬰非敢為富受也為通君賜也臣聞古之賢
君有受厚賜而不顧其困族則過之臨事守職不勝
其任則過之君之內隸臣之父兄若有離散在於野
鄙此臣之罪也君之內隸臣之所職若有播越在於
四方此臣之罪也兵革之不完戰車之不修此臣之
罪也若夫敝車駑馬以朝意者非臣之罪乎且臣以
君之賜父之黨無不乘車者母之黨無不足於衣食

者妻之黨無凍餒者國之間士待臣而後舉火者數百家如此者為彰君賜乎為隱君賜乎公曰善為我浮無字也

史記司馬穰苴者田完之苗裔也齊景公時晉伐阿甄而燕侵河上齊師敗績景公患之晏嬰乃薦田穰苴曰穰苴雖田氏庶孽然其人文能附眾武能威敵願君試之景公召穰苴與語兵事大說之以為將軍將兵扞燕晉之師穰苴曰臣素卑賤君擢之間伍之

中加之大夫之上士卒未附百姓不信人微權輕願
得君之寵臣國之所尊以監軍乃可於是景公許之
使莊賈往穰苴既辭與莊賈約曰旦日日中會于軍
門穰苴先馳至軍立表下漏待賈賈素驕貴以為將
已之軍而已為監不甚急親戚左右送之留飲日中
而賈不至穰苴則仆表決漏入行軍勒兵申明約束
約束既定夕時莊賈乃至穰苴曰何後期為賈謝曰
不佞親戚大夫送之故留穰苴曰將受命之日則忘

其家臨事約束則忘其親援枹鼓之急則忘其身今
敵國深侵邦內騷動士卒暴露於境君寢不安席食
不甘味百姓之命皆懸於君何謂相送乎召軍正問
曰軍法期而後至者云何對曰當斬莊賈懼使人馳
報景公請救既往未及反于是遂斬莊賈以徇三軍
三軍之士皆振慄久之景公遣使者持節赦賈馳入
軍中穰苴曰將在軍君令有所不受問軍正曰軍中
不馳令使者馳云何正曰當斬使者大懼穰苴曰君

之使不可殺之乃斬其僕車之左駙馬之左驥以徇
三軍遣使者還報然後行士卒次舍并竈飲食問疾
醫藥身自拊循之悉取將軍之資糧享士卒身與士
卒平分糧食最比其羸弱者三日而後勒兵病者皆
求行爭奮出為之赴戰晉師聞之為罷去燕師聞之
渡水而解于是追擊之遂取所亡封內故境而引兵
歸未至國釋兵旅解約束誓盟而後入邑景公與諸
大夫郊迎勞師成禮然後歸寢既見穰苴尊為大司

馬田氏日以益尊于齊已而大夫鮑氏高國之屬害之譖于景公景公退穰苴苴發病而死

明按陳桓子無宇生僖子乞執齊國之政操廢立之

權者自僖子始穰苴之忠其亦田氏之獨出者歟

哀公五年齊燕姬生子不成而死諸子鬻姒之子荼嬖

諸大夫恐其為太子也言於公曰君之齒長矣未有太

子若之何公曰二三子間於憂虞則有疾疢亦姑謀樂

何憂於無君公疾使國惠子高昭子立荼寘羣公子於

萊秋齊景公卒冬十月公子嘉公子駒公子黔奔衛公子鉏公子陽生來奔萊人歌之曰景公死乎不與埋三軍之事乎不與謀師乎師乎何黨之乎

逸補晏子景公有男五人所使傳之者皆有車百乘者

也晏子其一焉公召其傳曰勉之將以而所傳為子及晏子晏子辭曰君命其臣據其肩以盡其力臣敢不勉乎有車之家是一國之權臣也人人以君命命之曰將以而所傳為子此離樹別黨傾國之道也嬰

不敢受命願君圖之 淳子人納女子景公生孺子
荼景公愛之諸田謀欲廢公子陽生而立荼公以告
晏子晏子曰不可夫以賤匹貴國之害也置大立少
亂之本也夫陽生而長國人戴之君其勿易夫服位
有等故賤不凌貴立子有禮故孽不亂宗願君教荼
以禮而弗陷于邪導之以義而勿湛于利長少行其
道宗孽得其倫夫陽生敢毋使荼饜梁肉之味玩金
石之聲而有患乎廢長立少不可以教下尊孽卑宗

不可以利所愛長少無等宗孽無別是設賊樹姦之
本也君其圖之古之明君非不知繁樂也以為樂淫
則哀非不知立愛也以為義失則憂是故制樂以節
立子以道若夫恃讒諛以事君者不足以責信今君
用讒人之謀聽亂夫之言也廢長立少臣恐後人之
有因君之過以資其邪廢少而立長以成其利者君
其圖之公不聽景公沒田氏殺君荼立陽生殺陽生
立簡公而取齊國

六年齊陳乞偽事高國者每朝必驂乘焉所從必言諸大夫曰彼皆偃蹇將棄子之命皆曰高國得君必逼我盍去諸固將謀子子早圖之圖之莫如盡滅之需事之下也及朝則曰彼虎狼也見我在子之側殺我無日矣請就之位又謂諸大夫曰二子者禍矣恃得君而欲謀二三子曰國之多難貴寵之由盍去之而後君定既成謀矣盍及其未作也先諸作而後悔亦無及也大夫從之夏六月戊辰陳乞鮑牧及諸大夫以甲入於公宮昭

子聞之與惠子乘如公戰於莊敗國人追之國夏奔莒
遂及高張晏圉弦施來奔 八月齊邴意茲來奔 陳
僖子使召公子陽生陽生駕而見南郭且于曰嘗獻馬
於季孫不入於上乘故又獻此請與子乘之出萊門而
告之故闢止知之先待諸外公子曰事未可知反與壬
也處戒之遂行逮夜至於齊國人知之僖子使子士之
母養之與餚者皆入冬十月丁卯立之將盟鮑子醉而
徃其臣差車鮑點曰此誰之命也陳子曰受命於鮑子

遂誣鮑子曰子之命也鮑子曰女忘君之為孺子牛而折其齒乎而背之也悼公稽首曰吾子奉義而行者也若我可不必亡一大夫若我不可不必亡一公子義則進否則退敢不唯子是從廢興無以亂則所願也鮑子曰誰非君之子乃受盟使胡姬以安孺子如賴去鬻姒殺王甲拘江說囚王豹于匱竇之丘公使朱毛告於陳子曰微子則不及此然君異於器不可以二器二不匱君二多難敢布諸大夫僖子不對而泣曰君舉不信羣

臣乎以齊國之困困又有憂少君不可以訪是以求長
君庶亦能容羣臣乎不然夫孺子何罪毛復命公悔之
毛曰君大訪於陳子而圖其小可也使毛遷孺子於駘
不至殺諸野幕之下葬諸父冒淳八年齊悼公之來
也季康子以其妹妻之即位而逆之季鮪侯通焉女言
其情弗敢與也齊侯怒夏五月齊鮑牧帥師伐我取譴
及闡或譖胡姬于齊侯曰安孺子之黨也六月齊侯
殺胡姬秋及齊平九月臧賓如如齊涖盟齊閭丘明

來涖盟且逆季姬以歸嬖鮑牧又謂羣公子曰使女有
馬千乘乎公子懇之公謂鮑子或譖子子姑居于潞以
察之若有之則分室以行若無之則反子之所出門使
以三分之一行半道使以二乘及潞廩之以入遂殺之
冬十二月齊人歸譙及闡季姬嬖故也 十四年齊
簡公之在魯也闡止有寵焉及即位使為政陳成子憚
之驟顧諸朝諸御鞅言于公曰陳闡不可並也君其擇
焉弗聽子我夕陳逆殺人逢之遂執以入陳氏方睦使

疾而遺之潘沐備酒肉焉饗守囚者醉而殺之而逃子
我盟諸陳於陳宗初陳豹欲為子我臣使公孫言已已
有喪而止既而言之曰有陳豹者長而上僂望視事君
子必得志欲為子臣吾憚其為人也故緩以告子我曰
何害是其在我也使為臣他日與之言政說遂有寵謂
之曰我盡逐陳氏而立女若何對曰我遠於陳氏矣且
其違者不過數人何盡逐焉遂告陳氏予行曰彼得君
弗先必禍子子行舍于公宮夏五月壬申成子兄弟四

乘如公子我在幄出逆之遂入閑門侍人禦之子行殺
侍人公與婦人飲酒于檀臺成子遷諸寢公執戈將擊
之太史子餘曰非不利也將除害也成子出舍于庫聞
公猶怒將出曰何所無君子行抽劍曰需事之賊也誰
非陳宗所不殺子者有如陳宗乃止子我歸屬徒攻闔
與大門皆不勝乃出陳氏追之失道於弇中適豐丘豐丘
人執之以告殺諸郭闢成子將殺大陸子方陳逆請而免
之以公命取車於道及耏衆知而東之出雍門陳豹與

之車弗受曰逆為余請豹與余車余有私焉事子我而
有私於其讎何以見魯衛之士東郭賈奔衛庚辰陳恒執公
于舒州公曰吾早從鞅之言不及此 甲午齊陳恒弑
其君壬于舒州

逸補史記田常成子與監止俱為左右相相簡公田常
心害監止監止幸于簡公權弗能去於是田常復修
釐子之政以大斗出貸以小斗收齊人歌之曰嫗乎

采芑歸乎田成子

臣

士奇曰齊之有陳氏也自敬仲之奔始其終據齊權而盜有其國也自桓子之得政始其所以取民之術不過豆區釜鍾壺餐喚咻之小智而齊國又擅蒲魚鹽筴之饒其民貪利如驚自桓伯以來五公子爭立肉骨相殘至于惠靈莊景罷民自奉刑政日弛百姓外敝于疆場內殘于刀鋸山林之木衡鹿守之澤之萑蒲舟鮫守之藪之薪蒸虞候守之海之鹽蛤祈望守之無涓滴之惠及民陳

氏乃得以私恩小腆陰驅而固結之安得不愛之
如父母而從之如流水乎且也公族之失職久矣
子城子公公孫捷之徒越在草莽桓子皆反之而
皆益其祿凡公子公孫之無祿者私分之邑又不
貪樂高之賞以示公於是齊之世家大族下逮貧
約孤寡無不交口頌德歡忻歌舞而太公之社已
潛移于媯氏不知矣凡三家專魯六卿分晉其術
大抵皆然而其上不悟也王莽之篡漢陰謀狡智

亦復類是彼亦自稱田氏之後追祖有虞而沙麓
之崩史家附會以為巨君之祥又與鳳凰之占適
相類陳氏盜國之術真後先一轍哉然敬仲實賢
安羈旅辭上卿之位守禮法斷卜夜之飲是能抑
情止欲不敢妄覬於非分者後之子孫不亦覲然
有愧耶欒高之伐虎門也跡雖不臣未若陳氏之
甚欒高勝猶公族也陳氏勝則媿姓矣權其輕重
袒有左右而晏大夫端委公門坐觀成敗欒高奔

而陳氏之勢益張矣不亦左乎追陳乞陰賊高國
再竄齊之羽翼彌難殆盡荼及陽生簡公之際廢
置俱出田陳閹止以遠間親欲與爭衡庸有濟乎
豐丘執而舒州之亂遂作權以利成國隨勢奪理
所必然而左氏歷引懿氏之繇史趙之對先儒疑
戰國所作非丘明之書豈無見哉

左傳紀事本末卷二十二